

乾嘉詩文名家叢刊

張寅彭 ● 主編



姚 蓉 鹿苗苗 孫欣婷 點校

郭麐詩集

中

人民文學出版社



乾嘉詩文名家叢刊

張寅彭 ● 主編



姚 蓉 鹿苗苗 孫欣婷 點校

郭麐詩集

中



人民文學出版社



靈芬館詩三集

卷一

後移家集 甲子十一月起乙丑五月止

嘉平之月，復自賣魚橋移居東門之江家橋北。水光盪戶，塔影入窗，田畦稜稜，殊有野意。蓋來魏塘六年，至是始買宅定居焉，爲《後移家集》。

天長寺坐雨同霽青作

天涯聽雨又僧廬，牢落情懷破夢餘。青眼還爲吾子望，白頭未肯酒人疏。江湖寒影催征雁，節物清秋媚老漁。一樣綠牕紅燭底，此時定憶病相如。

題趙雪門蟬蛻庵

秋蟲無夏聲，秋士無春情。同居泥滓內，獨飽風露清。達人觀物化，鯤鳳隨變更。有形固爲累，委

蛻豈遂貞？吁嗟楚三閭，自潔苦近名。生遭椒蘭妬，死與日月爭。離騷二十五，嗷嗷鳴不平。何如古漁父，委蛇遂其生。今君名此室，取義竊未明。將謂學道損，去羶存其精。君乃好涉獵，圖史陳縱橫。將謂棄身世，內重則外輕。君亦多嗜好，弈博兼娉婷（一）。或云厭污濁，避世而遺榮。逝將入深山，遠與松喬盟。君又喜徵逐，間左紛豪英。文章雜嘲戲，絲竹羅杯觥。不聞同川浴，忽復譏裸裎。況欲自薦達，騎驢入畿京。王城萬人海，側肩趨其閤。名爭蝸角觸，聲極蟲飛薨。君乎蝨其間，恐益顏面頰。我今一言貢，處世勿世驚。世驚我何得，徒見小器盈。一勺自澄澈，只可儲瓶罍。一人既不醉，何不解衆醒。老氏固鄉原，靈均亦狂傖。士生貴有濟，豈必傳獨行。置身龍蠖屈，吐音鸞鳳鳴。蜉蝣一丸抱，妄謂九轉成。君無廢此語，以銘此庵楹。

【校記】

〔一〕『弈』，底本作『奕』，誤。

題玉環出浴圖

不用黃金買侍兒，玉荷葉底見凝脂。華清宮殿蓬萊島，一樣梨花帶雨時。

陳秋堂豫鍾屬題其祖半村先生臨蘭亭縮本一首

昌黎木彊人，姿媚輕義之。托言老道士，人間書不知。居然呼阿買，八分書其詩。吾黨有陳君，好古自得師。漆簡別科斗，石鼓搜蛟螭。落筆皆篆籀，下亦漢魏碑。今來手一軸，云自皇祖遺。二字見李習之集。規摹右軍法，仍以己意爲。天門見龍騰，蛇蚓徒倡披。我聞晉人書，古意猶未漓。蘭亭乃書聖，後世誰敢訾？況乃手澤在，精神見須眉。范研及魏笏，永永與後垂。我生止流俗，於古無一窺。爲文不識字，詎免昌黎嗤。偶能記名姓，便詡沙畫錐。辱君索題句，挂名慚汗滋。聊塗俗書俗，請學奇字奇。

送朱椒堂孝廉爲弼入都

制器能銘又能賦，當今作者紛無數。槃槃誰是大雅材，眼中之人庶一遇。眼中無過當湖朱，嗜古與世酸鹹殊。心靈所照科斗活，意匠欲到龍蛇驅。湯盤孔鼎今餘幾，記載存之有名理。不然但解記姓名，何用祖辛父己字？如君肯作薛尚功，學古以古爲心胸。偶然下筆自古色，何必詰屈人難通？我生事事皆流俗，文愛韓歐詩蘇陸。經談鄭孔恨太繁，字說商周苦難讀。見君雖晚聞君早，一昨逢君未知好。辟如人手古尊壘，滌器者誰酒家保。豈知君意味相親，謂我小異尋常人。酒酣以往互握手，自

匡而返能傷神。方今中朝古學重，幾輩天門一時羈。長眉廣額縱不屑，略作時妝已驚衆。送君行矣風滿窗，覩縷莫笑言多哢。旂常鍾鼎好相待，不識字筆猶如杠。

贈青士即送其計偕北上

早聞君名未及見，長安市上伯勞燕。張侯設酒偶識之，雲藻片語未通如不面。表忠觀裏群飲俱，主人折簡煩招呼。天寒萬事不暇問，但能痛飲皆吾徒。是日狂生醉幾死，眼底無人可知矣。髣髴茫茫平視中，有此翩翩一公子。去年作客極潦倒，難得天涯酒人好。酒人相聚或談詩，贈我一篇風格老。天風蕭蕭木葉黃，邀我策杖登韜光。雪落霏霏街鼓絕，同我醉歸踏寒月。十日五日頻過從，願長得酒長相逢。妻孥待米都不記，忽忽遂已當嚴冬。屠生琴塢磊落查生梅史狂，二潘吾亭、紅茶陳曼生范小湖何堂堂。居然入座皆弟畜，自顧頗覺須眉蒼。平生怕人少年社，鄉里小兒足嘲罵。老儒先達亦見嫌，倔強噴渠不相下。諸君知我君尤善，自憾知君識君晚。空洞還能王導容，汎濫已知奉高淺。努力男兒早致身，臨歧有語獨傷神。功名富貴尋常事，來歲長安足酒人。

後移居詩四首

移居記已未，此行最無端。如鳥非擇木，聊避射與彈。常憂鵝鴨惱，恐失鄰保歡。比來已六載，舉

動稍便安。童僕入市慣，不愁木橋難。親朋放舟來，不慮溪水乾。謂此雖偏仄，居然足槃桓。忽復舍之去，此舉又可歎。人生處世間，何者爲苟完？既免被迫逐，乃更求其寬。何時成獨往，一把香茅團？

移居在何所，乃在東門東。門前一溪水，中有塔影紅。三間爲草堂，兩架爲前榮。有樓峙堂後，窗側塔影中。有屋倚堂左，水流與前通。屋傍何所有，有地可十弓。土牆繚繞之，計種韭與菘。家具已見少，盍簪亦足容。顧此豈夏屋，於我良已豐。祭竈煩竈妾，請鄰來鄰翁。一翁扶杖嘆，敬告主人公。當時造此屋，曾見板築功。其餘不復論，請君視垣墉。成此不卅載，後嗣如飄蓬。君今入此屋，畜眼豈意逢？我聞未及答，書以示阿桐。

屋傍有古冢，其來不知年。面勢若避之，想在置屋先。叢蔓棘其穴，跛牂登其顛。有樵縱野火，無後挂紙錢。我來爲太息，酌酒贈之言。人處爭奪內，事事求安全。築室慮不廣，築牆慮不堅。何曾計此日，寂寞委荒阡？想當處華屋，聞此定不然。今我見壘培，爲戒儆目前。爲君飭家人，縛竹爲其藩。爲君戒兒童，勿驚君長眠。匹如比鄰住，豈論德與怨？嗚呼冥漠君，聽此雍門彈。

我家自秀水，播遷來蘆墟。力田而孝弟，秀者仍讀書。數傳家中落，老屋爲鄰租。我祖竭心力，乃復還其初。始吾來魏塘，豈輕去鄉間？偶成高鳳志，遂卜靈均居。邇者屋已賣，即歸欲何如？辛勤營一廛，奉親安妻孥。視舊雖閼敞，念故增欷歔。古人重堂構，先疇必菑畬。一椽亦舊德，蒼然百年餘。已既不克荷，望後寧非愚？永惟先壘在，有港名澄湖。地接吳越界，旦暮舟可拏。少待兒輩長，脫身得樵漁。因樹以爲屋，即墓以結廬。著書送日月，餘事勿白吾。

病中聞梅花開七分矣

潑眼韶光小病餘，偶聞好語倍愁余。撫床不覺春來早，顧影俄驚燈上初。人日草堂已今昔，花枝藥裏有親疏。山妻也向相如問，可擬無聊賦子虛？

贈壽生即用其題丹叔村夫子圖韻

讀書苦不多，著書苦不勤。徒令妄庸子，坐役中書君。墳塋待勒石，旂常望銘勛。苟無經世略，爲學亦有聞。方今好古學，以古與古分。識字聊爾爾，博物徒云云。譬如一力士，亦足雄三軍。營門列萬騎，勢必統一尊。無如蹶張輩，超距殊紛紜。吾黨有潘子，獨昭恥衆昏。說詩陋匡鼎，與元嗤劉棻。謂將入其室，必且檐先巡。謂將發其覆，先去幕與巾。衆言既洞曉，然後自著論。烏乎古之學，豈必求皇墳？立言但足用，大雅自不群。世方糟醢醢，懵然有餘醺。君何不自憙，乃更數爵頻？比者炤少熄，已若日就曛。即彼利祿路，久亦同環循。勿爲貴人惑，勿愁俗儒嗔。冥心博千古，努力忍一貧。

正月廿日同退庵父子壽生丹叔飲芝亭墨檀樂室踰月壽生

有詩相寄諸君皆和之芝亭持以見示亦同其韻

生平萬事皆偶然，坐偶須几臥須榻。家累真成負蝨蟲，積書何異聚沙塔？邇來嗜好總屏黜，處仲體疲便開閣。惟餘一病去未能，美酒入唇先欲啞。勇如季路夫豈敢，一醉劣能傾十榼。去年期君君不來，枉費封書一丸蠟。已煩妻子具尊疊，但共村鄰結腰臘。今年君到欲告行，謂達黃河浮涕潔。聞言未免作然疑，落落知君本難合。法言真摯能無從？賓戲荒唐未妨答。目中冠蓋徒紛紛，眼底乾坤空納納。風漢何勞上策陳，怪民詎可金門蹋？君聞吾語亦喟然，君年近卅吾逾卅。干將既謝躍冶祥〔一〕，南郭何堪隱几嗒。立春十日遠蓬蓬，昨夜徹宵風颯颯。耐可此客轄先投，莫問何門履容蹶。汪生好客意更殷，遣僕招邀腳三匝。投壺六博百戲爲，卷白打紅五組雜。過時追想真墜歡，往事重摹比響搗。和詩失笑不成章，顛倒天吳補殘衲。

【校記】

〔一〕「干」，底本作「千」，據民國本改。

疊前韻寄壽生

齊門有竿吳市簫，蓋公之堂周瑯榻。怪我十年辱在塗，看人千佛名題塔。言無可采但求田，過不能思慵閉閣。余髮已種手自搔，我舌猶存味能啞。王侯將相等浮漚，果蠃螟蛉笑挈榼。男兒自是可憐蟲，言語略如無味蠟。漫誇著作齊詩騷，那有糟糠供伏臘？如君本是青於藍，類我何殊河出渫。絕學思將一髮懸，奇窮直欲雙符合。十盪十決乃無前，五稱五窮孰能答？上書自薦金已盡，人貲爲郎粟難納。群兒裘馬自輕肥，幾輩蟾蜍巧騰蹋。得時豈必風論萬，相去何止里踰卅？暮啁朝啼不可當，行愁坐歎何辭啞。今年譚執極雄奇，比日投詩不衰颯。儒冠未遽頭顱知，大筆猶能腳指蹶。感慨無端太息三，睽離遽爾一月匝。和愁劇韻言多嘔，胸有煩冤說仍雜。何時孤憤書告成，他日辨顛帖爭搨。不如乞食從歌姬，尚有雲山舊時衲。

雲藻明府索和詠物四律

詩筒

問誰裁此碧雲寒，日暮吟成句未安。之子遠行少鴻雁，美人贈我有琅玕。百回不厭開函讀，一笑真成束筍看。傳語松陵酬倡侶，待歸留取伴漁竿。

酒帘

錯認花幡與畫叉，見來林角復檐牙。薄寒城郭占風色，微雨人家出杏花。草草長亭人駐馬，翩翩大字墨塗鴉。春遊已分鸛裘典，行處尋常未要賒。

琴囊

古錦方花裏陸離，誰憐囊下此材奇？能含栗里無弦意，想見昭文不鼓時。中有咸韶聽恐倦，世無夔曠出何遲。年來兼袖南風手，一任箏師與笛師。

碁奩

文楸暖玉各縱橫，爭地如君置不爭。偶爾胸中分白黑，蕭然局外見輸贏。楊裘客到薑芽斂，清簟人閒酒榼并。數著未終殘劫在，旁觀著眼尚分明。

送春詞四首和蘭泉先生

粉澹煙輕十四樓，烏衣群屐足清遊。傷心幾度秦淮綠，地下少年應白頭。余舊有秦淮送春曲，最爲秋農所賞，今秋農及其弟子仲芙皆已沒矣。

滑笏湖光潑墨天，水仙祠畔餞春筵。奚生死去吳郎別，回首跳珠已八年。戊午春盡日，蘭雪、曼生、夢華雨
中同集湖上，鐵生作西湖餞春圖，并書諸人之詩於上。

壁箋題句肯匆匆？老愛嬉春只此翁。記否前遊瑪瑙寺，貓頭笋白鼠姑紅。謂蘭泉先生。

漁莊傳唱送春詞，落拓江湖有所思。略話當時惆悵事，不知小杜鬢成絲。

得閒集 乙丑六月起十月止

五月以前，屢牽人事，且妄欲致力於古文辭，故詩絕少。六月臥病，幾死者至再至三。匝月始能彊起，看書則目眩，爲文則氣弱，未忘結習，呻吟中時有所作。東坡詩云『因病得閒殊不惡』，勞人草草，於此求息，亦足慨矣。

和退庵見示韻

支離病骨夏如秋，藥裹茶爐丈室幽。閒爲晝長看野馬，心知事過等虛舟。有時得句還慵續，往日書成尚待修。真覺近來多道氣，了無六鑿只天游。

伏枕時還一據梧，閒因病得亦良圖。故衣半減腰間帶，朝鏡驚長頷下鬚。鶴夢涼知天夜旦，雞皮潛換玉肌膚。極思孤艇西湖去，獵獵水風戰綠蒲。

病起懷人詩三十首并序

臥病一月，瀕死者再，中間旬餘，惛然如夢。時惟壽生一來看視，稱藥量水者，吳季子獨遊，余弟丹叔而已。虛堂偃息，稍復似人。痛定思痛，念幾與諸故人不復相見。伏枕呻吟，顯顯在目。又少時始得起坐，拂拭几研，聊復試筆，滴藥汁和墨，一食頃得絕句三十首。獨遊、丹叔取而讀之，憫其勞而喜其能不廢此事也，爲鈔錄存之，意到即成，亦不更次第云。

欹枕鰥鰥到夜闌，月痕漸淡燭光殘。若非病骨孱如此，那識虛堂六月寒？

一病無端兩鬢斑，寄聲故舊好開顏。多應尚爲諸君住，天上才多又放還。

詩壇兩浙魯靈光，老愛填詞亦擅場。唱遍康王新樂府，紅橋絲柳半斜陽。吳穀人祭酒。

尺書旁午使交馳，尚戀朋歡欲去遲。六月火雲君莫怨，卸裝正好荔支時。陳曼生明府。

此人未許點朝班，驢券匆匆下第還。一笑憐才元自有，只除紅粉便青山。許青士孝廉。『紅粉能憐倘是

才』，青士句也。

懶向長安市上眠，封侯骨相負鳶肩。世間那有此風漢，尚要還山讀十年。屠琴塢孝廉。

驚蛇飛鳥僧懷素，斗酒巖肩劉改之。不宦不婚情味惡，看他閒過少年時。范小湖秀才。

旖旎風流自可憐，蘭苕翡翠句新鮮。無端催爾渡江去，博得番番贈婦篇。父積堂文學。

如願拌償十斛珠，牙籤圍住萬蟬魚。莫言狂疾無靈藥，新得佳人未見書。何夢華上舍。

絹素紛紛乞字來，談天炙輠亦須才。知君長夏能消遣，濃墨三升酒一杯。高爽泉上舍。

江郎短視目如星，下筆能分粟米形。多病年來思學道，煩君細楷寫黃庭。江聽香秀才。

幾曾鍾乳媚間房，幾見傾身障簾傍。學道難成謀食拙，不如依舊著書忙。袁湘湄徵君。

白日飛書夜斫營，丞哉天子獨知名。只憐聽遍伊涼笛，不及連床聽雨聲。爰笛生少府。

議論縱橫似大蘇，笑談軒豁見眉須。諸公衮衮金華殿，有此村夫子也無？朱鐵門秀才。

劉蕡李邵從來少，卻恐成名在我先。一笑虎頭太癡絕，十年漂泊孝廉船。顧竺生孝廉。竺生不赴會試，人

問之，曰：「待頻伽同行耳。」可一笑也。

傲然長揖見王公，牛僧漿家盡與通。投牒天南有奇氣，如何閉置肯車中。尤二娛明府。時客浙江學使

者幕。

跨鶴揚州瘦骨輕，群公爭向下風迎。不知風雪楞伽下，何日重聽折竹聲？王鐵夫國博。

平生金石真成癖，昨得刀圭製更精。一樣無兒兩伯道，何時五嶽采真行？錢同人茂才。時以漢刀圭拓本

見示。

梢頭繭栗在揚州，共笑年來只近遊。秀澤單椒圖畫裏，妬君飽看鵲華秋。陳竹士茂才。

兩爲秦贅客天涯，張儉飄零未有家。安得洞庭千樹橘，招他夫婦種胡麻？張淥卿上舍。洞庭，其故居也。

尻高首下叩頭蟲，談藝依然氣若虹。旗蓋三分吾豈敢，不官不死不英雄。蔣伯生少府。伯生常言平生服

膺三人，黃仲則、張船山及余耳。

此君豈是撇裾人（二），小見東方乞米身。紈袴兒郎多傲睨，須防酒後筆如神。查梅史孝廉。

潘岳溫溫玉不如，萬人海裏自紬書。傳聞只似西湖住，不見門前一輛車。潘紅茶太史。

渺然江海不相聞，去燕來鴻各斷雲。只有樊南無藉在，高樓風雨憶司勛。吳蘭雪國博。

醉倒壚頭晚不醒，累君屯守到天明。年來故舊音塵絕，慙愧紅兒記姓名。金仲蓮舍人。前在京師，多酒人之游。昨友人自都中歸，仲蓮無書而伶人有問訊者，故戲及之。

報國書生匹馬驅，希文窮塞尚吳歔。清霜髡盡邊城柳，認得當年張緒無？張子白明府。

螭坳侍從中州守，不接音書幾載強。我比延年異通介，五君詠不廢山王。鮑覺生侍講、王儕嶠太守。

遠道難期近易親，黃公咫尺在東鄰。惱他一月北窗臥，一任人過不詣人。黃退庵上舍。

銷夏西湖願肯乖？料量行笈莫相催。待儂先向閒鷗說，約得風標公子來。潘壽生明經。時約同爲西湖之行。

墨汁相和藥汁濡，吟成病榻慰羈孤。天風鸞背煩相待，玉骨新來一把無？

【校記】

〔一〕『撇』，底本作『撇』，誤。

續懷人詩十二首

班馬文章老更成，遺經獨抱教諸生。佳兒好在青箱學，底用人間淡墨名？姚姬傳先生、根重孝廉。

第一功名世豈知，詩龜著述富當時。有人遠道三千里，傳說昌黎薦士詩。法時帆先生。梅史書來，云先生